



Broj: 04/4-03/11-05-474/08
Sarajevo: 26.11.2008. godine

KOLEGIJU OBA DOMA PARLAMENTARNE SKUPŠTINE BIH

KOMISIJI ZA VANJSKE POSLOVE PREDSTAVNIČKOG DOMA

**KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I
KOMUNIKACIJE DOMA NARODA**

**DELEGACIJI PARLAMENTARNE SKUPŠTINE BIH U PARLAMENTARNOJ SKUPŠTINI
CENTRALNOEVROPSKE INICIJATIVE**

KOLEGIJU SEKRETARIJATA PSBIH

**Predmet: Izvještaj s godišnjeg zasjedanja Parlamentarne skupštine
Centralnoevropske inicijative,
Kišinjev, Moldavija, 18. novembar 2008. godine**

Godišnje zasjedanje Parlamentarne skupštine Centralnoevropske inicijative održano je 18. novembra 2008., u Kišinjevu, Moldavija. Zasjedanju su prisustvovala delegacije parlamenata: Austrije, Bosne i Hercegovine, Češke, Italije, Mađarske, Makedonije, Moldavije, Poljske, Rumunije, Srbije i Ukrajine, te predstavnik Izvršnog sekretarijata CEI.

U ime Parlamentarne skupštine BiH, sastanku su prisustvovali **Mehmed Suljkanović**, predsjedavajući Delegacije PSBiH u PSCEI, i **Edina Hrnjić**, sekretar Delegacije.

Tema zasjedanja bila je: **Uloga nacionalnih parlamenata u procesu integracija u EU: CEI regionalni kontekst**. Sastankom je predsjedavao gosp. Valeriu Duma, šef Delegacije Moldavije u PSCEI, u ime moldavskog predsjedavanja Centralnoevropskom inicijativom. U svojstvu uvodničara, prisutnima su se obratili predstavnici zakonodavne i izvršne vlasti, te civilnog društva Republike Moldavije.

Prije zvaničnog otvaranja zasjedanja, održani su sastanci tri opća komiteta. Gosp. Suljkanović prisustvovao je sastanku Općeg komiteta za ekonomske poslove na kojem je razmatrana Rezolucija o nuklearnoj energiji koju je Komitet usvojio na svom sastanku u Pragu u junu 2008., te usvojena tema o kojoj će se diskutirati na sljedećem sastanku Komiteta (*Tema usvojena na prijedlog delegacije Srbije: Globalna finansijska kriza i zemlje Centralnoevropske inicijative*).

Godišnje zasjedanje PSCEI otvorio je gosp. Marian Lupu, predsjednik Parlamenta Republike Moldavije. Gosp. Lupu podsjetio je učesnike na prioritete moldavskog predsjedavanja Centralnoevropskom inicijativom te na značaj koji Moldavija u tom smislu pridaje podsticanju regionalne parlamentarne saradnje. Govoreći o ulozi nacionalnih parlamenata u procesu integracije u EU, gosp. Lupu istakao je kako je uloga parlamenata krucijalna s obzirom da se kroz parlamentarni rad i saradnju konstantno rađaju nove i svježije ideje.

Učesnici godišnjeg zasjedanja PSCEI potvrdili su, još jednom, da je glavni cilj Centralnoevropske inicijative izgradnja nove Evrope bez linija podjele i uključivanje svih zemalja na evropskom kontinentu u jedinstveno područje političkog, ekonomskog i kulturnog razvoja. Posebno su pozdravili pozitivne posljedice proširenja EU na stabilnost, ekonomski razvoj i održivi razvoj u cijelom regionu Centralnoevropske inicijative. Isto tako, izrazili su čvrsto uvjerenje da davanje jasne evropske perspektive zemljama članicama CEI koje nisu članice EU predstavlja snažan poticaj za ubrzavanje strukturalnih reformi neophodnih za bližu saradnju s Evropskom unijom. Saglasili su se, također, da CEI kao privilegirani regionalni forum za dijalog i saradnju može dati značajan i konkretan doprinos utvrđivanju mira i stabilnosti na evropskom kontinentu. Osim toga, parlamentarna saradnja unutar CEI ima vlastitu, značajnu ulogu u promoviranju demokratskih vrijednosti i evropskih standarda na nacionalnom i međunarodnom nivou, postižući održiv ekonomski razvoj, ubrzavajući strukturalne reforme, povećavajući stabilnost, sigurnost i blagostanje cijelog regiona.

Parlamentarna dimenzija Centralnoevropske inicijative podržala je namjeru vlada zemalja članica CEI da se fokusiraju na promoviranje zajedničkih projekata sa EU u okviru evropskih programa, posebno onih koji uključuju i države članice EU i one koje to nisu. Izražena je i snažna podrška Fondu za saradnju CEI i podrška njegovom povećanju u toku 2009. godine, te su pozvane vlade zemalja članica da razmotre povećanje svojih finansijskih doprinosa drugim projektima CEI, posebno u programima razmijene *know-how* i specijalnom fondu za klimu i zaštitu okoliša.

Na kraju, učesnici godišnjeg zasjedanja PSCEI naglasili su značaj repositioniranja Centralnoevropske inicijative, kao i potrebu institucionaliziranja stalnog sekretarijata Parlamentarne dimenzije Centralnoevropske inicijative što, kako je rečeno, zavisi od volje i odobrenja državnih parlamenata kao i od njihove spremnosti da, u skladu sa svojim mogućnostima, finansiraju taj projekat.

pripremila:

Edina Hrnjić

sekretar Delegacije

odobrio:

Mehmed Suljkanović

predsjedavajući Delegacije

Dostaviti:

- naslovu
- Odjelu za informacije i dokumentaciju
- Ministarstvu vanjskih poslova BiH
- a/a